

四庫全書

史部

欽定四庫全書

史部

水經注釋卷十六

詳校官監察御史臣周元良

刑部郎中臣許兆椿覆勘

總校官降調編修臣倉聖琳

校對官編修臣邱庭澂

謄錄監生臣陳以沆

欽定四庫全書

水經注釋卷十六

仁和趙一清撰

穀水

甘水

漆水

澶水

瀘水

補
洛水

穀水出宏農黽池縣南墻塚林穀陽谷

山海經曰傅山之西有林焉曰墻塚穀水出焉東流

注於洛其中多瑀玉今穀水出於峭東馬頭山穀陽

谷東北流歷黽池川本中鄉地也漢景帝三年

一清按漢

志是景帝初城徙萬戶為縣因峭黽之池以目縣焉

中二年 亦或謂之彭池故徐廣史記音義曰黽或作彭穀水

出處也穀水又東逕秦趙二城南司馬彪續漢書曰

赤眉從黽池自利陽南欲赴宜陽者也世謂之俱利

城耆彥曰昔秦趙之會各據一城秦王使趙王鼓瑟

蘭相如今秦王擊缶處也馮異又破赤眉於是川矣

故光武璽書曰始雖垂翅回溪終能奮翼黽池可謂

夫之東隅收之桑榆矣穀水又東逕土嶠北所謂三嶠也穀水又東左會北溪溪水北出龜池山東南流注於穀疑卽孔安國所謂澗水也穀水又東逕新安縣故城南北夾流而西接嶠龜昔項羽西入秦坑降卒二十萬於此國滅身亡宜矣穀水又東逕千秋亭南其亭壘石為垣世謂之城也潘岳西征賦曰亭有千秋之號子無七旬之期謂是水也又東逕雍谷溪回岫縈紆石路阻峽故亦有峽石之稱矣嶠水歷側

左與北川水合水有二源並導北山東南流合成一水自乾注巽入於穀穀水又東逕缺門山山阜之不接者里餘故得是名矣二僻爭高斗聳相亂西瞻雙阜右望如砥穀水自缺門而東廣陽川水注之水出廣陽北山東南流注於穀南望微山雲峯相亂穀水又逕白超壘南戴延之西征記云次至白超壘去函谷十五里築壘當大道左右有山夾立相去百餘步從中出北乃故闕城非所謂白超壘也是壘在缺門

東一十五里壘側舊有塢故治官所在魏晉之日引

穀水為水治以經國用遺迹尚有穀水又東石默溪

水出微山東麓石默溪東北流入於穀穀水又東宗

水北流注於穀穀水又東逕魏將作大匠母丘興盛

一清按魏書母丘儉傳及裴松之注引魏名臣奏議張既表俱作母丘興無盛字

墓南二碑

存焉儉父也管輅別傳曰輅嘗隨軍西征過其墓而

歎謂士友曰立武藏頭青龍無足白虎銜尸朱雀悲

哭四危已備法應滅族果如其言穀水又東逕函谷

關南東北流皂澗水注之水出新安縣東南流逕毋丘興盛墓東又南逕函谷關西關高嶮峽路出屋郭

漢元鼎三年樓船將軍楊僕數有大功恥居關外請以家僮七百人築塞徙關於新安即此處也昔郭丹西入關感慨於其下曰不乘駟馬高車終不出此關也去家十二年果如志焉皂澗水又東流入於穀穀

水又東北逕函谷關城東右合桑奭之水

一清按山海經桑奭

二水不相連屬 此是善長誤證 山海經曰白石山西五十里曰穀山

其上多穀其下多桑奘水出焉世謂之紵麻澗

一清按此

句是善長所增加非山海經原文下百谷水句同

北流注於穀其中多碧綠

穀水又東澗水注之山海經曰婁涿山西四十里曰白石之山澗水出焉北流注於穀自下通謂澗水為穀水之兼稱焉故尚書曰伊洛瀍澗既入於河而無穀水之目是名亦通稱矣劉澄之云新安有澗水源出縣北又有澗水未知其源余考諸地記並無澗水但澗澗字相似時有字錯為澗也故闕駟地理志曰

禹貢之淵水是以知傳寫書誤字繆舛真澄之不思所致耳既無斯水何源之可求乎穀水又東波水注之山海經曰瞻諸山西三十里曰婁涿之山無草木多金玉波水出於其陰世謂之百答水北流注於穀其中多砮石文石穀水又東少水注之山海經曰鹿山西三十里曰瞻諸之山其陽多金其陰多文石少水出於其陰控引衆溪積以成川

一清按八字亦是善長所增加

東流注於穀世謂之慈澗也穀水又東俞隨之水注之

山海經曰平蓬山西十里曰鹿山其陽多璵璠之玉
俞隨之水出於其陰北流注於穀世謂之孝水也潘

岳西征賦曰澡孝水以濯纓嘉美名之在茲

一清按五臣注

文選曰澡水經注作濟可見唐時官本原是
濟字古隸齊作舟形與桑似故濟澡互異耳是水在

河南城西十餘里故呂忱曰孝水在河南而戴延之
言在函谷關西劉澄之又云出檀山檀山在宜陽縣
西在穀水南無南入之理考尋茲說當承緣生述征
繆誌耳緣生從戍行旅征途訊訪既非舊土故無所

究今川瀾北注澄映泥濘何得言枯涸也皆為疏僻
矣

東北過穀城縣北

城西臨穀水故縣取名焉穀水又東逕穀城南不歷
其北又東逕河南王城西洛水枝流入焉今無水也
又東過河南縣北東南入於洛

河南王城西北穀水之右有石磧磧南出為死穀北
出為湖溝魏太和七年暴水流高三丈

一清按魏書
明帝太和四

年九月大雨伊洛河漢溢流晉宗五行志並同無七年暴水事下云太和五年於九龍渠上立千金碣修張王故績則四年伊洛暴水為此七年當因下晉秦始七年大水暴出而誤也胡朏明曰按曹魏明帝元魏孝文皆有太和年號明帝之太和終於六年故方輿紀要謂穀水入瀝經王城北自元魏時始瀝水出穀城山東南流至王城東北而南入洛周靈王壅穀使東注勢必與之合韋昭云穀在王城之北東入瀝是也其元魏所決者磧北之湖水耳澗瀝之合不自元魏始也 此地下澍流以成

湖渚造溝以通水東四十里決湖以注瀝水穀水又逕河南王城北所謂成周矣公羊曰成周者何東周也何休曰名為成周者周道始成王所都也地理志

曰河南河南縣故邾鄆地也京相璠曰邾山名鄆地
邑也卜年定鼎為王之東都謂之新邑是為王城其
城東南名曰鼎門蓋九鼎所從入也故謂是地為鼎
中楚子伐陸渾之戎問鼎於此述征記曰穀洛二水
本於王城東北合流所謂穀洛關也今城之東南缺
十步世又謂之穀洛關處俱為非也余按史傳周靈
王之時穀洛二水關毀王宮王將竭之太子晉諫王
不聽遺堰三堤尚存左傳襄公二十五年齊人城邾

穆叔如周賀韋昭曰洛水在王城南穀水在王城北
東入於澗至靈王時穀水盛出於王城西而南流合
於洛兩水相格有似於鬪而毀王城西南也潁容之
著春秋條例言西城梁門枯水處世謂之死穀是也
始知緣生行中造次入關經究故事與實違矣考王
封周桓公於是為西周及其孫惠公封少子於鞏為

東周故有東西之名矣秦滅周以為三川郡

全氏曰
按秦本

紀滅周在滅韓之後滅韓已置三川郡及項羽封申
滅周以其地并入三川耳善長所言未覈

陽為河南王漢以為河南郡王莽又名之曰保忠信

鄉一清按漢書王莽傳曰分三輔為六都尉河東河

內宏農河南潁川南陽為六隊郡置大夫職如太守屬正職如都尉更名河南大尹曰保忠信卿蓋河南屬縣滿三十置六郡州長各一人人主五縣及他

官名悉改大郡至分為五郡縣以亭為名者三百六十以應符命也是莽所改是官名非地名且莽方營

建東都恢宏其制豈肯改郡曰卿卿字是卿之

誤地理志作卿字道元又引之其由來舊矣 光武

都洛陽以為尹尹正也所以董正京畿率先百郡也

穀水又東流逕乾祭門北子朝之亂晉所開也全氏曰按

晉未嘗開門是誤讀東至千金竭河南十二縣境薄

左傳而妄言之者

曰河南縣城東十五里有千金塢洛陽記曰千金塢
舊堰穀水魏時更修此堰謂之千金塢積石為塢而
開溝渠五所謂之五龍渠渠上立塢塢之東首立一
石人石人腹上刻勒云太和五年二月八日庚戌造
築此塢更開溝渠此水衝渠止其水助其堅也必經
年歷世是故部立石人以記之云爾蓋魏文帝修王

張故績也

何氏曰亭林云文當作明全氏曰太和是
明帝年號亭林之言是也王即王梁張即

純張塢是都水使者陳協所造也語林曰陳協數進阮

步兵酒後晉文王欲修九龍堰阮舉協文王用之掘地得古承水銅龍六枚堰遂成水歷竭東注謂之千金渠逮於晉世大水暴注溝瀆泄壞又廣功焉石人東脇下云太始七年六月二十三日大水迸瀑出常流上三丈蕩壞二塢五龍泄水南注瀉下如歲久漱齧每澇即壞歷載捐棄大功故為今塢更於西開泄名曰代龍渠地形正平誠得瀉泄至理千金不與水勢激爭無緣當壞由其卑下水得踰上漱齧故也今

塢高千金於舊一丈四尺五龍自然必歷世無患若
五龍歲久復壞可轉於西更開二塢二渠合用二十
三萬五千六百九十八功以其年十月二十三日起
作功重人少到八年四月二十日畢代龍渠即九龍

渠也

全氏曰按五龍渠與九龍渠不同五龍渠即千
金渠若九龍渠作於魏明帝青龍三年是時崇

華殿災郡國九龍見明帝因更營九龍殿引
殺水為九龍池而築渠以堰之善長誤矣後張方

入洛破千金塢京師水碓皆涸永嘉初汝陰太守李
矩汝南太守袁孚修之以利漕運公私賴之水積年

一清按此處有脫文

渠塌頽毀石砌殆盡遺基見存朝廷太和

中修復故塌按千金塌石人西脇下文云若溝渠久
疏深引水者當於河南城北石磧西更開渠北出使
首狐丘故溝東下因故易就磧堅便時事業已訖然
後見之加邊方多事人力苦少又渠塌新成未患於
水是以不敢預修通之若於後當復興功者宜就西
磧故書之於石以遺後賢矣雖石磧淪敗故跡可憑
準之於文穀水北引渠東合舊瀆舊瀆又東晉惠帝

造石梁於水上按橋西門之南頰文稱晉元康二年十一月二十日改治石巷水門除豎枋更為函枋立作覆枋屋前後辟級續石障使南北入岸築治漱處破石以為殺矣到三年三月十五日畢訖并記列門廣長深淺於左右巷東西長七尺南北龍尾廣十二丈巷瀆口高三丈謂之瀆門橋潘岳西征賦曰秣馬牽門即此處也穀水又東又結石梁跨水制城西梁也穀水又東左會金谷水水出大白原東南流歷金

谷謂之金谷水東南流逕晉衛尉卿石崇之故居也

石季倫金谷詩集序曰余以元康七年從太僕出為

征虜將軍有別廬在河南界金谷澗中有清泉茂樹

衆果竹栢藥草蔽翳

朱氏謀璋箋曰此下宋本至今俱脫錯一清按此處失去一頁

無從補正中尉雖引季倫詩叙以補其缺軼而與下
西北角之文終不屬也金谷叙為善長所裁取已非

其舊故
不錄
西北角築之謂之金墉城魏文帝起層樓於

東北隅

寰宇記西京洛陽縣下云金墉城在故城西
北角魏明帝所築也洛陽地圖云金墉城內

有百尺樓一清按西北角之上當是叙洛陽故城今
本失之又城為魏明帝築則層樓不應云文帝起也

蓋亦明帝
之誤文
晉宮閣名曰金墉有崇天堂即此地上架

木為榭故曰樓矣皇居創徙宮極未就止蹕於此構
霄榭於故臺所謂臺以停停也南曰乾光門夾建兩
觀觀下列朱桁於塹以為御路東曰含春門北有暹
門城上西面列觀五十步一睥睨屋臺置一鐘以和
漏鼓西北連廡函陰墉北廣榭炎夏之日高祖常以
避暑為淶池一所在金墉者也穀水逕洛陽小城北
因阿舊城憑結金墉故向城也永嘉之亂結以為壘

號洛陽壘故洛陽記曰陵雲臺西有金市金市北對
洛陽壘者也又東歷大夏門下故夏門也陸機與弟
書云門有三層高百尺魏明帝造門內東側際城有
魏文帝所起景陽山餘基尚存孫盛魏春秋曰黃初
元年文帝愈崇宮殿雕飾觀閣取白石英及紫石英
及五色大石於太行穀城之上起景陽山於芳林園
樹松竹草木捕禽獸以充其中於是百役繁興帝躬
自掘土率羣臣三公已下莫不展力

全氏曰按孫盛
之記事疎矣此

乃明帝景初元年之事揚阜高堂隆交章爭之者也山之東舊有九江陸機洛

陽記曰九江直作負水水中作負壇三破之夾水得

相徑通賦曰濯龍芳林九谷八溪芙蓉覆水秋蘭被

崖今也山則塊阜獨立江無復髣髴矣渠水又東枝

分南入華林園歷疏圃南圃中有古玉井井悉以珉

玉為之以緇石一清按北堂書鈔引注作續石為口工作精密猶不

變古璨焉如新又逕瑤華宮南歷景陽山北山在都

亭堂上結方湖湖中起御坐石也御坐前建蓬萊山

曲池接筵飛沼拂席南面射侯夾席武峙背山堂上
則石路崎嶇巖嶂峻嶮雲臺風觀纓帶阜遊觀者
升降阿閣出入虹陞望之狀若鳧沒鸞舉矣其中引
木飛峯傾瀾瀑布或枉渚聲溜潺潺不斷竹柏蔭於
層石繡薄叢於泉側微颺暫拂則芳溢於六空實為
神居矣其水東注天淵池池中有魏文帝九花臺殿
基悉是洛中故碑累之今造釣臺於其上池南直魏
文帝茅茨堂前有茅茨碑是黃初中所立也

羊氏街
之洛陽

伽藍記曰華林南有石碑一所魏明帝所立也題云苗茨之碑高祖於碑北作苗茨堂永安中莊帝馬射於華林園百官皆來讀碑疑苗字誤國子博士李同軌曰魏明帝英才世稱三祖公幹仲宣為其羽翼但未知本意如何不得言誤也街之時為奉朝請因即釋曰以蒿覆之故曰苗茨何誤之有衆咸稱善以為得其指歸陳氏耀文天中記曰街之魏人親釋苗茨之義道元謂黃初所立誤矣一清按天淵池黃初五年所穿九華臺黃初七年所築或茅茨堂亦丕所建特其碑是獻所立未可知也又李同軌以公幹仲宣羽翼明帝亦未是劉王皆丕其水自天淵池東出華客至獻時二人之骨朽久矣

林園逕聽訟觀南故平望觀也魏明帝常言獄天下之命也每斷大獄恒幸觀聽之以太和三年更從今

名觀西北接華林餘簿昔劉楨磨石處也文士傳曰
文帝之在東宮也宴諸文學酒酣命甄后拜坐坐者
咸伏惟劉楨平仰觀之太祖以為不敬送徒隸簿後
太祖乘步牽車乘城降觀簿作諸徒咸敬而楨掘坐
磨石不動太祖曰此非劉楨也石如何性楨曰石出
荆山元巖之下外炳五色之章內秉堅貞之志雕之
不增文磨之不加瑩稟氣貞正稟性自然太祖曰名
豈虛哉復為文學池水又東流於洛陽縣之南池池

即故翟泉也南北百一十步東西七十步皇甫謐曰
悼王塋景王於翟泉今洛陽太倉中大冢是也春秋定
公元年晉魏獻子合諸侯之大夫於翟泉始盟城周
班固服虔皇甫謐咸言翟泉在洛陽東周之墓地今
按周威烈王葬洛陽城內東北隅景王家在洛陽太
倉中翟泉在兩冢之間側廣莫門道東建春門路北
路即東宮街也於洛陽為東北後秦封呂不韋為洛
陽十萬戶侯大其城并得景王家矣是其墓地也及

晉永嘉元年洛陽東北步廣里地陷有二鸞出蒼色者飛翔冲天白色者止焉陳留孝廉董養曰步廣周之翟泉盟會之地今色蒼胡象矣其可盡言乎後五年劉曜王彌入洛帝居平陽陸機洛陽記曰步廣里在洛陽城內宮東是翟泉所在不得於太倉西南也京相璠與裴司空彥季修晉輿地圖作春秋土地名亦言今太倉西南池水名翟泉又曰舊說言翟泉本自在洛陽北萇宏城周乃繞之杜預因其一證謂必

是翟泉而即實非也後遂為東宮池晉中州記曰惠
帝為太子出聞蝦蟇聲問人為是官蝦蟇私蝦蟇侍
臣賈盾對曰在官地為官蝦蟇在私地為私蝦蟇令
曰若官蝦蟇可給廩先是有識云蝦蟇當貴昔晉朝
收陸懷太子於後池即是池也其一水自大夏門東
逕宣武觀憑城結構不更增墉左右夾列步廊參差
翼趾南望天淵池北矚宣武塲竹林七賢論曰王戎
幼而清秀魏明帝於宣武塲上為欄苞虎阱使力士

袒裼迭與之搏縱百姓觀之戎年七歲亦往觀焉虎
乘間薄欄而吼其聲震地觀者無不辟易顛仆戎亭
然不動帝於門上見之使問姓名而異之塲西故賈
充宅地穀水又東逕廣莫門北漢之穀門也北對芒
阜連嶺修互苞懋衆山始自洛口西踰平陰悉芒壘
也魏志曰明帝欲平北芒令登臺見孟津侍中辛毗
諫曰若九河溢涌洪水為害丘陵皆夷何以禦之帝
乃止穀水又東出屈南逕建春門石橋下即上東門

也阮嗣宗詠懷詩曰步出上東門者也一曰上升門
晉曰建陽門百官志曰洛陽十二門候一人六百石
東觀漢記曰邳惲為上東門候光武嘗出夜還詔開
門欲入惲不內上令從門間識面惲曰火明遠遠遂
拒不開由是上益重之亦表本初挂節處也橋首建
兩石柱橋之右柱銘云陽嘉四年乙酉壬申詔書以
城下漕渠東通河濟南引江淮方貢委輸所由而至
使中謁者魏郡清淵馬憲監作石橋梁柱敦敕工匠

盡要妙之巧攢立重石累高周距橋工路博流通萬

里云云河南尹邳崇隗

一清按河南尹官也邳郡望也崇隗人姓名也漢志魯國

薛縣下云夏車正奚仲所國後遷於邳又東海郡下邳縣臣瓚云有上邳故曰下邳也王子侯表呂后三年封楚元王子邳客為上邳侯即薛也續志註云臨淮郡永平十五年更為下邳國此單稱邳銘於陽嘉年其為下邳無疑也

丞勃海重合雙福水曹掾中牟任防史王

蔭史趙興將作吏睢陽申翔道橋掾成峯單國洛陽

令江雙丞平陽降監掾王騰之主石作右北平山仲

三月起八月畢成其水倚柱文自樂里道屈而東出

陽渠昔陸機為成都王穎入洛敗北而返水南即馬市也舊洛陽有三市斯其一也亦嵇叔夜為司馬昭所害處也北則白社故里也昔孫子荆會董威輦於白社謂此矣以同載為榮故有威輦圖又東逕馬市石橋橋南有二石柱並無文刻也漢司空漁陽王梁之為河南也將引穀水以溉京都渠成而水不流故以坐免後張純堰洛以通漕洛中公私穰瞻是渠今引穀水蓋純之創也按陸機洛陽記劉澄之水初記

言城之西面有陽渠周公制之也昔周遷殷民於洛邑城隍偏狹卑陋之所耳晉故城成周以居敬王秦又廣之以封不韋以是推之非專周公可知矣亦謂之九曲瀆河南十二縣境簿云九曲瀆在河南鞏縣西西至洛陽又按傅暢晉書云都水使者陳狼鑿運渠從洛口入注九曲至東陽門是以阮嗣宗詠懷詩所謂朝出上東門遙望首陽岑又言遙遙九曲間徘徊欲何之者也陽渠水南暨閭闔門漢之上西門者

也漢宮記曰上西門所以不純白者漢家厄於戍故
以丹鏤之太和遷都徙門南側其水北乘高渠枝分
上下歷故石橋東入城逕望先寺中有碑碑側法子
丹碑作龍距勢於今作則佳方古猶劣渠水又東歷
故今寺南直千秋門古宮門也又枝流入石逗伏流
注靈芝九龍池魏太和中皇都遷洛陽經構宮室修
理街渠務窮幽隱發石視之曾無毀壞又石工細密
非今之所擬亦奇為精至也遂因用之其一水自千

秋門南流逕神虎門下東對雲龍門二門衡楸之上
皆刻雲龍風虎之狀以火齊薄之及其晨光初起夕
景斜輝霜文翠照陸離眩目又南逕通門掖門西又
南流東轉逕閭闔門南按禮王有五門謂臯門庫門
雉門應門路門路門一曰畢門亦曰虎門也魏明帝
上法太極於洛陽南宮起太極殿於漢崇德殿之故
處改雉門為閭闔門昔在漢世洛陽宮殿門題多是
大篆言是蔡邕諸子自董卓焚宮殿魏太祖平荊州

漢吏部尚書安定梁孟皇善師宜官八分體求以贖
死太祖善其法常仰繫帳中愛翫之以為勝宜官北
宮榜題咸是鵠筆南宮既建明帝令侍中京兆韋誕
以古篆書之皇都遷洛始令中書舍人沈含馨以隸
書書之景明正始之年又敕符節令江式以大篆易
之今諸桁榜題皆是式書周官太宰以正月懸治法
於象魏廣雅曰闕謂之象魏風俗通曰魯昭公設兩
觀於門是謂之闕從門厥聲爾雅曰觀謂之闕說文

曰闕門觀也漢官典職曰偃師去洛四十五里望朱雀闕其上鬱然與天連是明峻極矣洛陽故宮名有朱雀闕白虎闕蒼龍闕北闕南宮闕也東觀漢記曰更始發洛陽李松奉引車馬奔觸北闕鐵柱門三馬皆死即斯闕也白虎通曰門必有闕者何闕者所以飾門別尊卑也今闔闔門外夾建巨闕以應天宿雖不如禮猶象而魏之上加復思以易觀矣廣雅曰復思謂之屏釋名曰屏自障屏也孛思在門外孛復也

臣將入請事於此復重思之也漢末兵起壞園陵學
思曰無使民復思漢也故鹽鐵論曰垣闕罕思言樹
屏隅角所架也潁客又曰闕者上有所失下得書之
於闕所以求論譽於人故謂之闕矣今闕前水南道
右置登聞鼓以納諫也昔黃帝立明堂之議堯有衢
室之間舜有告善之旌禹有立鼓之訊湯有總街之
誹武有靈臺之復皆所以廣設過誤之備也渠水又
枝分夾路南出逕大尉司徒兩坊間謂之銅駝街舊

魏明帝置銅駝諸獸於闔闔南街陸機云駝高九尺
即出太尉坊者也水西有永寧寺熙平中始創也作

九層浮圖

一清按魏書藝術傳永寧寺九層浮圖郭安興為匠

浮圖下基方一

十四丈自金露林下至地四十九丈取法代都七級

一清按七級浮圖在代都是元魏所
創九層在前七級在後何云取法耶

而又高廣之雖

二京之盛五都之富利靈圖未有若斯之構按釋
法顯行傳西域有爵離浮圖其高與此相狀東都西
域諸為莊妙矣其地是曹爽故宅經始之日於寺內

西南隅得爽窟室下入地可丈許地壁悉累方石砌
之石作細密都無所毀其石悉入法用自非曹爽庸
匠亦難復制此桓氏有言曹子丹生此豚犢信矣渠
左是魏晉故廟地今悉民居無復遺墉也渠水又西
歷廟社之間南注南渠廟社各以物色辨方周禮廟
及路寢皆如明堂而有燕寢焉惟祧廟則無後代通
為一廟列正室於下無復燕寢之制禮天子建國左
廟右社以石為主祭則希寃今多王公攝事王者不

親拜焉咸寧元年洛陽大風帝社樹折青氣屬天元
王東渡魏社代昌矣渠水自銅駝街東逕司馬門南
魏明帝始築闕崩壓殺數百人遂不復築故無闕門
南屏中舊有置銅翁仲處金狄既淪故處亦禡惟壞
石存焉自此南直宣陽門經緯通達皆列駝道往來
之禁一同兩漢曹子建嘗行御街犯門禁以此見薄
渠水又東逕杜元凱所謂翟泉北今無水坎方九丈
六尺深二丈餘似是人工而不類於泉陂是驗非之

一證也又皇甫謐帝王世紀云王室定遂徙居成周
小不受王都故壞翟泉而廣之泉源既塞明無故處
是驗非之二證也杜預言翟泉在太倉西南既言西
南於洛陽不得為東北是驗非之三證也稽之地說
事幾明矣不得為翟泉也渠水歷司空府前逕太倉
南出東陽門石橋下注陽渠穀水自閭闔門而南逕
土山東水西三里有坂坂上有土山漢大將軍梁冀
所成築土為山植林成苑張璠漢記曰山多峭阪以

象二嶠積金玉採捕禽獸以充其中有人殺苑兔者
迭相尋逐死者十三人南出逕西陽門舊漢氏之西
明門也亦曰雍門矣舊門在南太和中以故門邪出
故徙是門東對東陽門穀水又南逕白馬寺東昔漢
明帝夢見大人金色項佩白光以問羣臣或對曰西
方有神名曰佛形如陛下所夢得無是乎於是發使
天竺寫致經像始以榆欂盛經白馬負圖表之中夏
故以白馬為寺名此榆欂後移在城內愍懷太子浮

圖中近世復遷此寺然金光流照法輪東轉創自此
矣穀水又南逕平樂觀東李尤平樂觀賦曰乃設平
樂之顯觀章祕偉之奇珍華嶠後漢書曰靈帝於平
樂觀下起大壇上建十二重五采華蓋高十丈壇東
北為小壇復建九重華蓋高九丈列奇兵騎士數萬
人天子住大蓋下禮畢天子躬擐甲稱無上將軍行
陣三匝而還設祕戲以示遠人故東京賦曰其西則
有平樂都場示遠之觀龍雀蟠蜿天馬半漢應劭曰

飛廉神禽能致風氣古人以良金鑄其象明帝永平
五年長安迎取飛廉并銅馬置上西門外平樂觀今
於上西門外無他基觀惟西明門外獨有此臺巍然
廣秀疑即平樂觀也又言皇女稚瑒埋於臺側故復
名之曰皇女臺晉灼曰飛廉鹿身頭如雀有角而蛇
尾豹文董卓銷為金用銅馬徙於建始殿東階下胡
軍喪亂此象遂亡穀水又南逕西明門故廣陽門也
門左枝渠東派入城逕太社前又東逕太廟南又東

於青陽門右下注陽渠穀水又南東屈逕津陽門南
故津門也昔洛水泛洸漂害者衆津陽城門校尉將
築以遏水諫議大夫陳宣止之曰王尊臣也水絕其
足朝廷中興必不入矣水乃造門而逕穀水又東逕
宣陽門南故苑門也皇都遷洛移置於此對閭闔門
南直落水浮桁故東京賦曰沂洛背河左伊右瀍者
也夫洛陽考之中土卜惟洛食實為神也門左即洛
陽池處也池東舊平城門所在矣今塞北對洛陽南

宮故蔡邕曰平城門正陽之門與宮連屬郊祀法駕所由從出門之最尊者洛陽諸宮名曰南宮有謬臺

一清按說文曰周景王作謬臺尺氏切 臨照臺東京賦曰其南則有謬

門曲榭邪阻城洫注云謬門冰室門也阻依也洫城下池也皆屈曲邪行依城池為道故說文曰隍城池也有水曰池無水曰隍矣謬門即宣陽門也門內有宣陽冰室周禮有冰人日在北陸而藏之西陸朝覲而出之冰室舊在宣陽門內故得是名門既擁塞冰

室又罷穀水又逕靈臺北望雲物也漢光武所築高六丈方二十步世祖嘗宴於此臺得廷鼠於臺上亦

諫議大夫第五子陵之所居倫少子也

一清按三輔決錄注云名

頤以清正為郡功曹洛陽無主人鄉里無田宅寄止

靈臺或十日不炊司隸校尉南陽左雄尚書廬江朱

孟興等皆倫故孝廉功曹各致禮餉並辭不受永建

中卒穀水又東逕平昌門南故平門也又逕明堂北

漢光武中元元年立尋其基構上圓下方九室重隅

十二堂蔡邕月令章句同之故引水於其下為辟雍也穀水又東逕開陽門南晉宮閣名曰故建陽門也漢官曰開陽門始成未有名宿昔有一柱來在樓上瑯琊開陽縣上言南城門一柱飛去光武皇帝使來識視良是遂堅縛之因刻記年月日以名焉何湯仲弓嘗為門候上微行夜還湯閉門不納朝廷嘉之又東經國子太學石經北周禮有國學教成均之法學記曰古者家有塾黨有庠遂有序國有學亦有虞氏

之上庠下庠夏后氏之東序西序殷人之左學右學
周人之東膠虞庠王制曰養國老於上庠養庶老於
下庠故有大學小學教國之子弟焉謂之國子漢魏
以來置太學於國子堂東漢靈帝光和六年刻石鐫
碑載五經立於太學講堂前悉在東側蔡邕以熹平
四年與五官中郎將堂谿典光祿大夫楊賜諫議大
夫馬日磾議郎張馴韓說太史令單飈等求正定六
經文字靈帝許之邕乃自書丹於碑使工鐫刻立於

大學門外於是後儒晚學咸取正焉及碑始立其觀
視及筆寫者車乘日千餘兩填塞街陌矣今碑上悉
銘刻蔡邕等名魏正始中又立古篆隸三字石經古
文出於黃帝之世倉頡本鳥跡為字取其孳乳相生
故文字有六義焉自秦用篆書焚燒先典古文絕矣
魯恭王得孔子宅書不知有古文謂之科斗書蓋因
科斗之名遂效其形耳言大篆出於周宣之時史籀
創著平王東遷文字乖錯秦之李斯及胡毋敬又改

籀書謂之小篆故有大篆小篆焉然許氏字說專釋於篆而不本古文言古隸之書起於秦代而篆字文繁無會劇務故用隸人之省謂之隸書或云即程邈於雲陽增損者是言隸者篆捷也孫暢之嘗見青州刺史傅宏仁說臨淄人發古冢得銅棺前和外隱起為隸字言齊太公六世孫胡公之棺也唯三字是古餘同今書證知隸自出古非始於秦魏初傳古文出邯鄲淳石經古文轉失淳法樹之於堂西石長八尺

廣四尺列石於其下碑石四十八枚廣三十丈魏文

帝又刊典論六碑附於其次

赫釋石經殘碑曰水經光緒六年立石於太學

其上悉刻蔡邕名魏正始中又刻古篆隸三字石經蓋諸儒受詔在熹平而碑成則光和年也隋志有一字石經七種三字石經三種其論云漢鑄七經皆蔡邕書又云魏立一字石經其說自相矛盾新舊唐志有今字石經七種而注論語曰蔡邕作又有三字石經古篆兩種蓋唐史以隸為今字也觀遺經字畫之妙非蔡中即輩不能為以黃初後來碑刻比之相去不啻霄壤豈魏人筆力可到當以水經為據三體者乃魏人所刻儒林傳云為古文篆隸三體者非也又隸續三體石經左傳遺字曰石經見於范史帝紀及儒林宦者傳皆曰五經蔡邕張馴傳則曰六經惟儒林傳云為古文篆隸三體書法鄺氏水經云漢立石

經於太學魏正始中又刻古文篆隸三字石經唐志
有三字石經古篆兩種曰尚書曰左傳獨隋志所書
異同其目有一字石經七種三字石經三種既以七
經為蔡邕書矣又云魏立一字石經乃其誤也范蔚
宗時三體石經與熹平所鐫並列於學宮故史筆誤
書其事後人襲其譌錯或不見石刻無以考正趙氏
雖以一字為中郎所書而未嘗見三體者歐陽氏以
三體為漢碑而未嘗見一字者近世方勺作泊宅編
載其弟甸所跋石經亦為范史隋志所惑指三體為
漢字至公羊碑有馬日磬等乃云魏世用其所正定
之本因存其名可謂繆論一清按景伯據水經之事
實辨後漢書隋志之抵牾悟定一字為漢刻三字為魏
碑其言簡而核他說紛紜不足錄也吾杭杭編修世
駿撰石經考異蒼萃羣籍足補亭林顧氏之缺四明
全庶常祖望更增廣之搜剔益無遺漏石經之陳迹
一旦顯於千百年之後也又按鄰氏之言亦非也據

陳壽三國志魏書明帝紀太和四年春二月戊子詔太傅三公以文帝典論刊石立於廟門之外不云於太學也搜神記乃云詔刊石於廟門之外及太學裴世期曰皆從征西至洛陽歷觀舊物見典論石經在太學者尚存而廟門外無之問諸長老云晉初受禪即用魏廟移此石於太學非兩處立也竊謂此言不然蓋以搜神記所云為非也蓋石經立於太學典論自在廟門之外道元以晉移為魏立恐不如世期目覩耳聞之較實也又三少帝紀注引搜神記以典論為魏明帝立詔三公曰先帝昔著典論不朽之格言其刊石立於廟門之外及太學與石經並以永示萬世至齊王紹位之初西域獻火浣布子桓夙謂不然於是刊滅此論而天下笑之今云文帝刊附亦誤也

陸機言太學贊別一碑在講堂西下列石龜碑載蔡邕韓說堂谿典等名太學

弟子贊復一碑在外門中今二碑並無石經東有一碑是漢順帝陽嘉元年立碑文云建武二十七年造太學年積毀壞永建六年九月詔書修太學刻石記年用工作徒十一萬二千人陽嘉元年八月作畢碑南面刻頌表裏鏤字猶存不破漢石經北有晉辟雍行禮碑是太始二年立其碑中折但世代不同物不停故石經淪缺存半毀幾駕言永久諒用憮焉考古有三雍之文今靈臺太學並無辟雍處晉永嘉中王

彌劉曜入洛焚毀二學尚髣髴前基矣穀水於城東
南隅枝分北注逕青陽門東故清明門也亦曰稅門
也亦曰芒門又北逕東陽門東故中東門也又北逕
故太倉西洛陽地記曰大城東有太倉倉下運船常
有千計即是處也又北入洛陽溝穀水又東左迤為
池又東右出為方湖東西一百九十步南北七十步
故水衡署之所在也穀水又東南轉屈而東注謂之
阮曲云阮嗣宗之故居也穀水又東注鴻池陂百官

志曰鴻池池名也在洛陽東二十里丞一人二百石池東西千步南北千一百步四周有塘池中又有東西橫塘水溜逕通故李尤鴻池陂銘曰鴻澤之陂聖王所規開源東注出自城池也其水又東左合七里澗晉後畧曰成都王穎使吳人陸機為前鋒都督伐京師輕進為洛軍所乘大敗於鹿苑人相登躡死於塹中及七里澗澗為之滿即是澗也澗有石梁即旅人橋也昔孫登不欲久居洛陽知楊氏榮不保終思

欲邀迹林鄉隱淪妾死楊駿埋之於此橋之東駿後
尋亡矣搜神記曰太康末京師始為折楊之歌有兵
革辛苦之辭駿後被誅太后幽死折楊為之應也凡
是數橋皆累石為之亦高壯矣制作甚佳雖以時往
損功而不廢行旅未超石與兄書云橋去洛陽宮六
七里悉用大石下員以通水可受大舫過也奇制作
題其上云太康三年十一月初就功用七萬五千
人至四月末止此橋經破落復更修補今無復文字

陽渠水又東流逕漢廣野君酈食其廟南廟在北山
上成公綏所謂偃師西山也山上舊基尚存廟宇東
面門有兩石人對倚北石人胸前銘云門亭長石人
西有二石闕雖經頽壞猶高大餘闕西即廟故基也
基前有碑文字剥缺不復可識子安仰澄芳於萬古
讚清徽於廟像文字一清按朱氏謀璋箋曰文字下有脫誤當是載字謂成公子安
集中有酈生廟碑文也未知然否姑存之厥集矣陽渠水又東逕亳殷南
昔盤庚所遷改商曰殷此始也班固曰尸鄉故殷湯

所都者也故亦曰湯亭薛瓚漢書注皇甫謐帝王世紀並以為非以為帝嘗都矣晉太康記地道記並言田橫死於是亭故改曰尸鄉非也余按司馬彪郡國志以為春秋之尸氏也其澤野負原夾郭多墳壑焉即陸士衡會王輔嗣處也袁氏王陸詩叙機初入洛次河南之偃師時忽結陰望道左若有民居者因往逗宿見一少年姿神端遠與機言玄機服其能而無以酬折前至一辨文機題緯古今綜檢名實此少年

不甚欣解將曉去稅駕逆旅嫗曰君何宿而來自東
數十里無村落止有山陽王家墓機乃怪悵還睇昨
路空野昏霾雲攢蔽日知所遇者審王弼也此山即
祝雞翁之故居也搜神記曰祝雞翁者洛陽人也居
尸鄉北山下養雞百年餘雞至千餘頭皆有名字欲
取呼之名則種別而至後之吳山莫知所去矣

全氏曰此

下不叙陽渠水入穀之處疑有脫文且原流分合多有錯誤無從攷正一清按洛水篇經云又東至偃師城南注云洛水又北陽渠水注之則陽渠水於偃師城南由穀入洛寰宇記引輿地志云洛陽城外四面

有陽渠水即周公所置也上源注函谷東流注城西
北角仍分流繞城至建春門外合流又折而東注於
池是穀水又東逕偃師城南皇甫謐曰帝嘗作都於

毫偃師是也王莽之所謂師氏者也穀水又東流注

於洛水矣

禹貢雖指曰穀水有二道一在洛陽城北
自皋門橋屈南逕建春門下蓋即王梁之

所引道元所謂舊瀆者也一在洛陽城南自閭闔門
屈東逕開陽門又東逕偃師城南又東注於洛即張
純所穿此皆周靈王壅穀洛後
歷代遞遷之水道非禹迹也

甘水出宏農宜陽縣鹿蹠山

山在河南陸渾縣故城西北俗謂之縱山水之所導

發於山曲之中故世人目其所為甘掌焉

東北至河南縣南北入洛

甘水發源東北流北屈逕一故城東在非山上世謂之石城也京相璠曰或云甘水西山上夷汙而平有故甘城在河南城西二十五里指謂是城也余按甘水東一十許里洛城南有故甘城焉北對河南故城世謂之鑿洛城鑿甘聲相近即故甘城也為王子帶之故邑矣是以昭叔有甘公之稱焉

全氏曰按王子帶稱太叔死死

後稱甘昭公不稱昭叔 甘水又與非山水會水出非山東谷東

流入於甘水甘水又於河南城西北入洛經言縣南

非也故京相璠曰今河南河南縣西南有甘水

一清按杜

元凱謂之甘泉 北入洛斯得之矣

漆水出扶風杜陽縣俞山東北入於渭

山海經曰踰次之下漆水出焉北流注於渭盖自此

而南矣尚書禹貢太史公禹本紀云導渭水東北至

涇又東涇漆沮入於河孔安國曰漆沮二水名亦曰

洛水也出馮翊北周太王去邠度漆踰梁山止岐下
故詩云民之初生自土沮漆又曰率西水滸至於岐
下是符禹貢本紀之說許慎說文稱漆水出右扶風
杜陽縣岐山東入渭從水黍聲又云一曰漆城池也
潘岳關中記曰關中有涇渭灃澇鄠鄠漆沮之水鄠
鄠漆沮四水在長安西南鄠縣皆注鄠鄠水北注渭
開山圖曰麗山西北有溫池溫池西南八十里岐山
在杜陽北長安西有渠謂之柒渠班固地理志云漆

水出漆縣西關駟十三州志又云漆水出漆縣西北至岐山東入渭今有水出杜陽縣岐山北漆溪謂之柒渠西南流注岐水但川土奇異今說互出考之經

史各有所據識淺見浮無以辨之矣

王氏應麟詩地攷曰沮漆名稱

相亂水經云沮水出北地郡直路縣東過馮翊殺祠縣北東入於洛此沮水之源流也漢志扶風有漆縣漆水在縣西東入渭又關駟十三州記云漆水出漆縣西北至岐山東入渭此漆水之源流也沮水出北地入洛漆水出扶風入渭沮自沮漆自漆也至孔氏引水經云沮水俗謂之漆水又謂之漆沮此則名稱相亂矣諸家書解以出扶風之漆水與出北地之沮水為二謂扶風之漆水至岐山入渭在灋之上流而

書言渭水會澧會涇之後乃過漆沮則漆沮在澧水
涇水之下流故以書之漆沮為出北地之漆沮與詩
扶風之漆別也但水經出北地者止是沮水而謂之
漆沮耳如上所言則詩之漆沮自是二水書之漆沮
止是一水即詩之沮也然水經之沮入洛書之漆沮
則入渭沮水若為漆沮一名洛水則漆沮即洛也而
又云入洛何也姑闕之以俟知者程氏大昌雍錄曰
禹貢止有漆沮秦漢以後始有洛水諸家言洛即漆
沮所謂洛水者地理志曰出北歸縣戎夷中今按其
水自入塞後逕邠坊同之三州乃始入渭孔安國輩
謂自馮翊懷德縣入渭者是也漢懷德同州衙縣也
所謂沮水者長安志曰自邠州東北來至華原縣南
流乃合漆水入富平縣石川河石川河者沮水正派
也所謂漆水者長安志曰漆水自華原縣東北同官
縣界來南流入富平縣石川河是為合漆之地此三
水分合之詳也若槩三水而命其方則漆在沮東至

華原而西乃始合沮沮在漆西既已受漆則遂南東而合乎洛洛又在漆沮之東至同州白水縣則遂混為一流故自孔安國班固以後論著此水者皆指懷德入渭之水以為洛水而曰洛即漆沮者言其本同也洛之泐名不知起自何世秦用鄭國鑿谷口渠已曰鑿涇注洛則洛久出秦前矣若其立洛名而蓋掩漆沮則難究其始也一清按程文簡公辨洛漆沮三水甚詳足破羣疑其云洛之泐名不知何始周禮雍州浸曰渭洛具載職方豈所論於嬴氏之朝乎又北歸縣是地理志北地郡歸德縣之誤

澹水出京兆藍田谷北入於灞

地理志曰澹水出南陵縣之藍田谷西北流與一水合水出西南莽谷東北流注澹水澹水又北歷藍田

川北流注於灞水地理志曰漣水北至灞陵入灞水

全氏曰漢志京兆尹南陵縣沂水出藍田谷北至霸陵入霸師古曰沂音先歷反按鄭注首尾再引班志似是沂水之即漣水也但不知何以誤漣為沂而沂又何以有涇音也一清按此是今本漢書傳刻之訛宏農郡析縣師古音先歷反沂與析字形相近先歷之音於析則是而沂則非也行間斷爛何人填補致斯巨繆若師古不應如是之貿貿也水字亦作溼見渭水注霸陵縣可知本字不誤而其音則非

瀘水出北地直路縣東過馮翊殺柎縣北東入於洛清一

按古本水經瀘水今俗誤作沮史記索隱曰沮水地理志無文而水經以瀘水出北地直路縣東過馮翊殺柎縣入洛說文瀘水出北地直路西東入洛从水盧聲側加切沮水出漢中房陵東入江从水且聲子余切今北

地之瀘與漢中之沮更無分別觀小司馬所引猶見唐時水經之善與許氏字說合也

地理志曰沮出畿縣西東入洛

郡一清按地理志北地

西入洛不云畿縣也畿縣之名不見漢志東西之文又互相異鄭氏所引未知何據而司馬貞云沮水地理志無文更不解其義也今按孔穎達尚書正義導渭又東過漆沮下去彼漆則扶風漆水也彼沮則未聞蓋孔傳以漆沮為二水名亦曰洛水而後之言洛水者總以漆沮之名當之此是不與班志之漆沮同故胡朏明曰本疏引扶風漆水蓋未定之論失於刊正耳然則雍州及導渭之漆沮當依顏師古漢書注漆沮即馮翊之洛水為據而與班志扶風漆縣下之漆水北地直路下之沮水不相符同此小司馬所以云地理志無文孔仲達今水自直路縣東南逕焦石亦云彼沮則未聞也

山東南流歷檀臺川俗謂之檀臺水屈而夾山西流
又西南逕宜君川世又謂之宜君水又得黃嶽水口
水西北出雲陽縣石門山黃嶽谷東南流注宜君水
又東南流逕祿祠縣故城西縣以漢景帝二年置其
水南合銅官水水出縣東北西南逕銅官川謂之銅
官水又西南流逕祿祠縣東西南流逕其城南原下
而西南注宜君水宜君水又南出土門山西又謂之
瀘水又東南歷土門南原下東逕懷德城南城在北

原上

一清按寰宇記懷德故城在今富平縣西南十一里非漢懷德縣也蓋後漢及三國時因漢舊

名於此立縣今有慶城存括地理志懷德故城在州朝邑縣西南四十三里據此則是漢縣與此城有別

又東逕漢太上皇陵北陵在南原上瀘水東注鄭渠

昔韓欲令秦無東伐使水工鄭國間秦鑿涇引水謂

之鄭渠渠首上承涇水於中山西邸瓠口所謂瓠中

也爾雅以為周焦獲矣為渠並北山東注洛三百餘

里欲以溉田中作而覺秦欲殺鄭國曰始臣為間然

渠成亦秦之利卒使就渠渠成而用注填闕之水溉

澤鹵之地四萬餘頃收皆畝一鍾關中沃野無復凶
年秦以富彊卒并諸侯命曰鄭渠渠瀆東逕宜秋城
北又東逕中山南河渠書曰鑿涇水自中山西封禪
書漢武帝獲寶鼎於汾陰將薦之甘泉鼎至中山氤
氲有黃雲蓋焉徐廣史記音義曰關中有中山非冀

州者也指證此山俗謂之仲山非也

一清按顧祖平
曰圖經中山北

接差莪西距治谷南並九夔涇河自中而出故名中
山一云以山在治谷水西涇水東也俗譌仲山云漢
高祖見仲居此道元以為非得之矣鄭渠又東逕捨車宮南絕冶谷水

鄭渠故瀆又東逕截薛山南陽池縣故城北又東絕

清水又東逕北原下濁水注焉

一清按孔氏尚書正義引注作濯水

自

濁水以上無

一清按下有脫文

濁水上承雲陽縣東大黑泉

東南流謂之濁谷水又東南出原注鄭渠又東歷原

逕曲梁城北又東逕太上陵南原下北屈逕原東與

澶水合分為二水一水東南出即濁水也至白渠東與

澤泉合俗謂之菜水又謂之為菜沮水絕白渠東逕

萬年縣故城北為櫟陽渠城即櫟陽宮也漢高帝葬

皇考於是縣起墳陵署邑號改曰萬年也地理志曰
馮翊萬年縣高帝置王莽曰異赤也故徐廣史記音
義曰櫟陽今萬年矣闕駟曰縣西有涇渭北有小河
謂此水也其水又南屈更名石川水又西南逕郭猿
城西與白渠枝渠合又南入於渭水也其一水東出
即瀘水也東與澤泉合水出瀘東澤中與瀘水隔原
相去十五里俗謂是水為柒水也東流逕薄昭墓南
冢在北原上又逕懷德城北東南注鄭渠合瀘水又

自瀘直絕注濁水至白渠合焉故濁水得渠沮之名也瀘循鄭渠東逕當道城南城在頻陽縣故城南頻陽宮也秦厲公置城北有頻山山有漢武帝殿以石架之縣在山南故曰頻陽也應劭曰縣在頻水之陽今縣之左右無水以應之所可當者惟鄭渠與瀘水又東逕蓮芍縣故城北十三州志曰縣以草受名也瀘水又東逕漢光武故城北又東逕粟邑縣故城北王莽更名粟城也後漢封騎都尉耿夔為侯國其水

又東北流注於洛水也

補
洛水

禹貢錐指曰禹貢豫有洛而雍無洛洛水之名其昉於殷周之際乎周禮雍州之浸曰渭洛水經無洛水之目唯沮水渭水注中一見然寰宇記慶州安化縣尉李城下引水經注云洛川南逕尉李城東北合馬嶺水號白馬水華池縣子午山舊名翟道山一謂之雞山引水經云有鳥雞水出焉西北注於洛水樂蟠

縣有水出縣西北引水經注云與青山水合寧州安
定縣洛水下引水經一名馬嶺川水注云洛水又南
逕柁邑故城北與新陽川水合珊瑚谷水下引水經
云珊瑚水東南至柁邑入洛襄樂縣大延水下引水
經注云大延小延水出油水南延溪西南流逕襄樂
南於延城西二水合流油水下引水經云與追語川
水並出東翟道山鄜州洛交縣白水下引水經云白
水源出分水嶺三川縣葦谷水下引水經注云自葦

谷東南流入三川黃原水下引水經注云砂羅谷水
南流逕黃原祠東合葦川坊州中部縣石堂山下引
水經注云猪水西出翟道山西石堂山本名翟道山
穆天子傳曰癸酉天子命駕八駿之駟造父為御南
征朔野逕絕翟道升於太行翟道即縣之石堂山也
郭璞以為隴右狄道非也淺石川下引水經云淺石
川水出翟道山香川水下引水經注云香川水出中
部縣北香山在縣西南三十七里自宜君縣界來南

香水在縣南三十五里志遺谷泥水下引水經云泥
水出程道縣泥谷蒲水下引水經注云蒲谷水泥出
中部縣蒲谷原丹州宜川縣丹陽川下引水經云蒲
川水自鄜州洛川縣流入丹陽川延州膚施縣清水
下引水經注云清水出上郡北流至老人谷俗謂老
人谷水又東逕高奴縣合豐林水同州馮翊縣商原
下引水經注云洛水南逕商原西俗謂許原也一清按許
原顧祖禹引水經注作許沙阜下引水經注云洛水
原云志云沮水之許也

東逕沙阜北其阜東西八十里南北三十里俗名之
曰沙苑澄城縣新城下引水經注云雲門谷水源出
澄城縣界朝邑縣朝坂下引水經注云洛水東南歷
疆梁原俗所謂朝坂此皆言洛水而今本無之是水
經元有洛水篇宋初尚存後乃亡之耳一清按胡氏
所引寰宇記清水一條已見卷三河水注蓋偶有不
照也漢志北地郡郿縣泥水出北蠻夷中有牧師
苑官又有泥陽縣莽曰泥陰蓋泥水所逕也說文作

沂水沂泥字通用蒲谷水亦見渭水注中又寰宇記
安化縣下云周地圖記云郁郅城今名尉李城注水
經云尉李城亦曰不窟城澄城縣溫泉下引水經注
云水有三源奇川鴻瀉西注於洛亦曰帝嚳泉丹州
汾川縣下引水經注云汾川縣西有殺狗嶺初學記
丹州引水經注云烏川水出汾川縣西北按汾川縣
本漢上郡地魏太和八年置安平縣屬北汾州其州
在河西三堡鎮東更有南汾州魏大統十八年省北

汾州乃取丹陽川號立汾川縣道元卒於孝昌三年
下距大統十八年已歷二十六年何緣知有置縣事
乎且西魏文帝殂於大統十七年三月明年廢帝欽
元年亦非十八年也汾川縣之文得無誤耶魏書地
形志云汾州延和三年為鎮太和十二年置州治蒲
子城孝昌中陷移治西和事見北史裴延儁傳延儁
從祖弟良稍遷尚書考功郎中時汾州吐京胡薛羽
等作逆以良兼尚書左丞為西北道行行山胡劉蠡

升自云有聖術胡人信之咸相影附以良為汾州刺史加輔國將軍行臺如故良以城人飢窘夜率衆奔西河汾州之居州河自良始也又初學記引水經注云丹州豬水流逕柏城遼州兔川西南流注洛水蒲州小蒲川水東南流入坊州太平御覽引水經曰白於山今名女郎山上多松柏下多樗櫟其獸多牝牛斄羊鳥多白鴉洛水出於其陽東注於渭也又洛水源出縣北白於山按括地志曰白於山在慶州洛源

縣所謂縣北即洛源縣之北也山海經曰孟山西百
五十里曰白於之山其鳥多鴉郭璞曰鴉似鳩而青
色盛宏之荊州記云有鳥如鷓雞其名爲鴉楚人謂
之鵬史記索隱引水經曰洛水出上郡彫陰秦冒山
過華陰入渭此真漢代經文洛水之源委具焉漢志
北地郡歸德縣下云洛水出北蠻夷中入河左馮翊
懷德縣下云洛水東南入渭蓋由渭以達於河也又
河水注云河水又南洛水自獵山枝分東派東南注

於水全祖望曰此洛水即雍州北地之所出也經流則合漆沮以入渭而支流則自上郡入河史記晉文公攘戎狄居於囿洛之間是洛水地望之見於七國之先者地理志引職方冀州之浸曰汾潞闕駟以為潞即濁漳是也而師古曰潞出歸德蓋以潞為洛繆之甚矣

水經注釋卷十六

欽定四庫全書

史部

水經注釋卷十七至十九

詳校官監察御史臣周元良

刑部郎中臣許兆椿覆勘

總校官降調編修臣倉聖脉

校對官編修臣汪學奎

謄錄監生臣畢繼曾

欽定四庫全書

水經注釋卷十七

仁和趙一清撰

渭水上

渭水出隴西首陽縣渭谷亭南烏鼠山

渭水出首陽縣首陽山渭首亭南谷山在烏鼠山西

北北縣有高城嶺嶺上有城號渭源城渭水出焉三

山渭水出谷尚書禹貢所謂渭出烏鼠者也地說曰
烏鼠山同穴之枝幹也渭水出其中東北流過同穴
枝間既言其過明非一水也又東北流而會于殊源
也渭水東南流逕首陽縣南右得封溪水次南得廣
相溪水次東得共谷水左則天馬溪水次南則伯陽
谷水並參差翼注亂流東南出矣

又北過襄武縣北

廣陽水出西山二源合注共成一川東北流注于渭

渭水又東南逕襄武縣東北荆頭川水入焉水出襄武西南烏鼠山荆谷東北逕襄武縣故城北王莽更名相桓漢護羌校尉溫序行部為隗囂部將苟宇所拘銜鬚自刎處也其水東北流注于渭渭水常若東南不東北也又東泉水注之水出西南雀富谷東北逕襄武縣南東北流入于渭魏志稱咸熙二年襄武上言大人見身長三丈餘跡長三尺二寸白髮著黃單衣巾拄杖呼民王始語云今當太平十二月天祿

永終運數在晉遂遷魏而事晉

又東過獮道縣南

右則岑溪水次則同水其左則過水合注之渭水東

南逕獮道縣故城西昔秦孝公西斬戎之獮王于此

應劭曰獮戎邑也漢靈帝中平五年別為南安郡赤

亭水出郡之東山赤谷西流逕城北南入渭水渭水

又逕城南得粟水水出西南安都谷東北流注于渭

渭水又東新興川水出西南烏鼠山二源合舍東北

流與彰川合水出西南溪下東北至彰縣南本屬故道侯尉治後漢縣之永元元年和帝封耿秉為侯國也萬年川水出南山東北流注之又東北注新興川又東北逕新興縣北晉書地道記南安之屬縣也其水又東北與南水合水出西南山下東北合北水又東北注于渭水渭水又東逕武城縣西武城川水入焉津源所導出鹿部西山兩源合注東北流逕鹿部南亦謂之鹿部水又東北昌丘水出西南丘下東北

注武城水亂流東北注渭水渭水又東入武陽川又

有闕城川水出南安城谷水出北丘川參差注渭水

渭水又東逕落門西山

一清按章懷後漢書注曰隴西縣東南有落門山落門水

出焉東流三府谷水注之三川統一東北流注于渭水

有落門聚昔馮異攻落門未拔而薨建武十年來歙

又攻之擒隗囂子純隴右平渭水自落門東至黑水

峽左右六水夾注左則武陽溪水東北得土門谷水

俱出北山南流入渭右則溫谷水次東有故城溪水

次東有閭里溪水亦名習溪水次東有黑水並出南山北流入渭渭水又東出黑水峽歷冀川

又東過冀縣北

一清按說文驩下云天水有驩縣是驩字

渭水自黑水峽至岑峽南北一十水注之北則溫谷水注之其水導源平襄縣南山溫溪東北流逕平襄縣故城南故襄戎邑也王莽之所謂平相矣其水東南流歷三堆南又東流而南屈入黃槐川

一清按此處有脫字

梗津渠冬則輟流春夏水盛則通川注渭次則午谷

水南入渭水南有長塹谷水次東有安蒲溪水次東有衣谷水並南出朱圉山山在梧中聚有石鼓不擊自鳴鳴則兵起漢成帝鴻嘉三年天水冀南山有大石自鳴聲隱隱如雷有頃止聞于平襄二百四十里野鷄皆鳴石長三尺廣厚畧等在崖脇去地二百餘丈民俗名曰石鼓石鼓鳴則有兵是歲廣漢鉗子攻死囚盜庫兵畧吏民衣繡衣自號為山君黨與寢廣明年冬伏誅自歸者三千餘人信而有徵矣其水北

逕冀縣故城北秦武公十年伐冀戎縣之故天水郡
治王莽更名填戎縣曰冀治漢明帝永平十七年改
曰漢陽郡城即隗囂稱西伯所居也後漢馬超之圍
冀也涼州別駕閻伯儉潛出水中將告急夏侯淵為
超所擒令告城無救伯儉曰大軍方至咸稱萬歲超
怒數之伯儉曰卿欲令長者出不義之言乎遂殺之
渭水又東合冀水水出冀谷次東有濁谷水次東有
當里溪水次東有託里水次東有渠谷水次東有黃

土川水俱出南山北逕冀城東而北流注于渭渭水
又東出岑峽入新陽川逕新陽下城南溪谷赤蒿二
水並出南山東北入渭水渭水又東與新陽崖水合
即隴水也東北出隴山其水西流隴右逕瓦亭南隄
罌聞峇陽陷使牛邯守瓦亭即此亭也其水亦出隴

山東南流歷瓦亭北又西南合為一水謂之瓦亭川

一清按寰宇記引郡國志曰烏氏縣有瓦亭一名薄
落亭今本續志云烏枝有瓦亭出薄落谷蓋有缺文
疑當作烏枝有瓦亭一名薄
落亭瓦亭水出薄落谷也 西南流逕清賓溪北又

西南與黑水合水出黑城北西南逕黑城西西南流
莫吾南川水注之水東北出隴垂西南流歷黑城南
注黑水黑水西南出懸鏡峽又西南入瓦亭川又有

滋水自西來會世謂之鹿角口

一清按漢志安定郡烏氏縣烏水出西北

入河都廬山在西莽曰烏亭劉昭郡國志補註曰本傳有龍池山地道記曰烏水出烏水即黑水之異名乎寰宇記潘原縣烏水出都廬山有西烏水又東北逕烏氏縣東注于涇謂之閭水水然涇水間有石巖東會兩川也西烏水即所謂滋水自西來會者也懸鏡峽即所謂石巖乎又隴西記云襄武縣有錦鏡峽即黑水所經其峽四望花木明媚影其中因名漢志云入河而此注云入渭寰宇記云入涇涇渭合流

蓋由渭以連于河也又南逕河陽縣故城東中平元年北地羌

胡與邊章侵隴右漢陽長史蓋勲屯河陽以拒賊即

此城也其水又南與燕無水合水源延發東山西注

瓦亭水瓦亭水又南左會方城川西注瓦亭水瓦亭

水又南逕成紀縣東歷長離川謂之長離水右與成

紀水合水導源西北當亭川東流出破石峽津流遂

斷故瀆東逕成紀縣故帝太皞庖犧所生之處也漢

氏以為天水郡縣句王莽之河陽郡治也一清按漢志莽改天

水郡為填戎此又云阿陽蓋是又東潛源隱發通之
支郡所謂大郡至分為五者也

成紀水東南入瓦亭川水又東南與受渠水相會
水東出大隴山西逕受渠亭北又西南入瓦亭川
水又西南流歷僵入峽路側巖上有死人僵尸巖穴
故岫壑取名焉釋鞍就穴直上可百餘仞石路逶迤
劣通單步僵尸倚窟枯骨尚全唯無膚髮而已訪其
川居之士云其鄉中父老作兒童時已聞其長舊傳
此當是數百年骸矣其水又西南與畧陽川水合水出

隴山香谷西流右則單溪西注左則閭川水入焉其
水又西歷蒲池郊石魯水出東南石魯溪西北注之
其水又西入略陽川西得破社谷水次西得平相谷
水又西得金里谷水又西得南室水又西得蹠谷水
並出南山北流于畧陽城東揚波北注川水又西逕
略陽道故城北渥渠水出南山北逕渥峽北入城建
武八年中郎將來歛與祭遵所部護軍王忠右輔將
軍朱寵將二十人皆持鹵刀斧自安民縣之楊城永

始二年成帝罷安定呼他苑以為安民縣起官寺市

里全氏曰永始二年以下二十二字是注中注按漢書此是平帝元始二年事師古曰中山之安定也

平帝以中山王入正大統則宜是中山之安定呼他即呼池善長所引誤矣班志無安民縣蓋暫置而即

省者一清按劉昭郡國志補注安定郡臨涇縣下引謝承書曰宣仲為長史民叛留改宜民見李固傳而

志無此改宜承之妄乎宜民疑即安民之訛蓋西京已有是稱不始于宣仲昭以承說為妄當矣又地理

志鉅鹿郡有定安縣其故城在今祁州東鹿縣西七里此即中山之安定也元和志深州鹿城縣東至州

二十里本漢安定縣地屬鉅鹿郡隋開皇三年改為鹿城取縣東故鹿城為名海沱河在縣西北四十

二里苑蓋從番須回中伐樹木開山道至畧陽夜襲以水為名

擊囂拒守將軍金梁等皆殺之因保其城囂聞略陽陷悉衆以攻歙激水灌城光武親將救之囂走西城世祖與來歙會于此其水自城北注川一水二川蓋囂所塌以灌畧陽也川水西得白楊泉又西得蒲谷水西得蒲谷西川又西得龍尾溪水與蒲谷水合俱出南山飛清北入川水又西南得水洛口水源東導隴山西逕水洛亭西南流又得犢奴水口水出隴山西逕犢奴川又西逕水洛亭南西北注之亂流西

南逕石門峽謂之石門水西南注畧陽川畧陽川水
又西北流入瓦亭水瓦亭水又西南出顯親峽石宕
水注之水出北山山上有女媧祠庖羲之後有帝女
媧焉與神農為三皇矣其水南流注瓦亭水瓦亭水
又西南逕顯親縣故城東南漢封大鴻臚竇固為侯
國自石宕次得蝦蟆溪水又得金黑水又得宜都溪
水咸出左右參差相入瓦亭水又東南合安夷川口
水源東出胡谷西北流歷夷川水與東陽川水會謂

之取陽交又西得何宕川水又西得羅漢水並自東
北西南注夷水夷水又西逕顯親縣南西注瓦亭水
瓦亭水又東南得大華谷水又東南得折里溪水又
東得六谷水皆出近溪湍峽注瓦亭水又東南出新
陽峽崕岫壁立水出其間謂之新陽崕水又東南流
入于渭是也

又東過上邽縣

渭水東歷縣北封山之陰流逕固嶺東北東南流蘭

渠川水出自北山帶佩衆溪南流注于渭渭水東南
與神澗水合開山圖所謂靈泉池也俗名之為萬石
灣淵深不測實為靈異先後漫遊者多離其斃渭水
又東南得歷泉水北出歷泉溪東南流注于渭渭水
又東南出橋亭西又南得藉水口水出西山百澗聲
流總成一川東歷當亭川即當亭縣治也左則當亭
水注之右則曾席水入焉又東與大弁川水合水出
西山二源合注東歷大弁川東南流注于藉水藉水

又東南流與竹嶺水合水出南山竹嶺二源同瀉東
北入藉水藉水又東北入上邽縣左佩五水東會占
溪水次東有大魯谷水次東得小魯谷水次東有楊
反谷水咸自北山流注藉水藉水右帶五水竹嶺東
得亂石溪水次東得木門谷水次東得羅城溪水次
東得山谷水皆導源南山北流入藉水藉水又東黃
瓜水注之其水發源黃瓜西谷東流逕黃瓜縣北又
東清溪白水左右夾注又東北大旱谷水南出旱溪

歷澗北流泉溪委漾同注黃瓜水黃瓜水又東北歷赤谷咸歸于藉藉水又東合毛泉谷水又東逕上邽縣故城南又得覈泉水並出南山北流注于藉藉水即泮水也北有濛水注焉水出縣西北邽山翼帶衆流積以成溪東流南屈逕上邽縣故城西側城南出上邽故邽戎國也秦武公十年伐邽縣之舊天水郡

治一清按晉志魏志天水郡皆治上邽與兩漢之治冀縣異道元故分別言之五城相接

北城中有湖水有白龍出是湖風雨隨之故漢武帝

元鼎三年改為天水郡

一清按漢志天水郡師古引秦中記云郡前湖水冬夏無

增減因其名焉其鄉居悉以板蓋屋詩所謂西戎板屋也濛

水又南注藉水山海經曰邽山濛水出焉而南流注于洋謂是水也藉水又東得陽谷水又東得宕谷水並自南山北入于藉藉水又東合段溪水水出西南馬門溪東北流合藉水藉水又東入于渭渭水又歷橋亭南而入綿諸縣東與東亭水合亦謂之為橋水也清水又或為通稱矣水源東發小隴山衆川瀉浪

統成一水西入東亭川為東亭水與小祗大祗二水
合又西北得南神谷水三川並出東南差池瀉注又
有埋蒲水翼帶二川與延水並西南注東亭水東亭
水又西右則曠溝水次西得麩谷水水側出東南二
溪西北流注東亭川東亭川水右則溫谷水出小隴
山又西蒞谷水出南山蒞溪西南注東亭川水東亭
川水又西得清水口清水導源東北隴山二源俱發
西南出隴谷合成一水西南流歷細野峽逕清池谷

又逕清水縣故城東王莽之識睦縣矣其水西南合東亭川謂之清水口又逕清水縣故城南又西與秦水合水出東北大隴山秦谷二源雙導歷三泉合成

一水而歷秦川川有故秦亭秦仲所封也秦之為號

始自是矣

一清按地理志曰孝王曰昔伯益知禽獸子孫不絕乃封為附庸邑之于秦今隴西

秦亭秦谷是也郡因志曰砥城聚有秦亭

秦水西逕降隴縣故城南又西

南自亥松多

一清按松多胡名也晉大興二年屠各胡松多起兵附晉王保據草壁劉曜攻

拔之松多奔隴城是也

二水出隴山合而西南流逕降龍城北

又西南注秦水秦水又西南歷隴川逕六槃口過清
水城西南注清水清水上下咸謂之秦川又西羗水
注焉水北出羗谷引納衆流合以成溪澍水星會謂
之小羗水西南流左則長谷水西南注之右則東部
水東南入焉羗水又南入清水清水又西南得綿諸
水口其水導源西北綿諸溪東南與長思水合北出
長思溪南入綿諸水又東南歷綿諸道故城北東南
入清水清水東南注渭渭水又東南合涇谷水水出

西南涇谷之山東北流與橫水合水出東南橫谷西
北逕橫水壙又西北涇谷水亂流西北出涇谷峽又
西北軒轅谷水注之水出南山軒轅溪南安姚瞻以
為黃帝生于天水在上邽城東七十里軒轅谷皇甫
謚云生壽邱邱在魯東門北未知孰是也其水北流
注涇谷水又西北合白城溪東北流白娥泉水出其
西東注白城水白城水又東北入涇谷水涇谷水又
東北歷董亭下楊難當使兄子保宗鎮董亭即是亭

也其水東北流注于渭山海經曰涇谷之山涇水出
焉東南流注于渭是也渭水又東伯陽谷水入焉水
出刑馬山之伯陽谷北流白水出東南白溪西北注
伯陽水伯陽水又西北歷谷引控羣流北注渭水又
東歷大利又東南流苗谷水注之水南出刑馬山北
歷平作西北逕苗谷屈而東逕伯陽城南謂之伯陽
川蓋李耳西入往逕所由故山原畎谷往往播其名
焉渭水東南流衆川瀉浪邊次鳴注左則伯陽東溪

水注之次東得望松水次東得毛六溪水次東得皮
周谷水次東得黃杜東溪水並出北山南入渭水其
右則胡谷水次東得丘谷水次東得丘谷東溪水次
東有銅巖谷水並出南山東北注渭渭水又東南出
石門度小隴山逕南由縣南東與楚水合世所謂長
蛇水水出汧縣之數歷山也南流逕長蛇戍東魏和
平三年築徙諸流民以遏隴寇楚水又南流注于
渭闕駟以是水為汧水焉又東汧汧二水入焉余按

諸地志泝水出泝縣西北關駟十三州志與此同復以泝水為龍魚水蓋以其津流逕通而更攝其通稱矣渭水東入散關抱朴子神仙傳曰老子西出關令尹喜候氣知真人將有西遊者遇老子彊令之著書耳不得已為著道德二經謂之老子書也有老子廟于寶搜神記云老子將西入關關令尹喜好道之士覩真人當西乃要之途也皇甫士安高士傳云老子為周柱下史及周衰乃以官隱為周守藏室史積

八十餘年好無名接而世莫知其真人也至周景王
十年孔子年十七遂適周見老聃然幽王失其道平
王東遷關以擇移人以職從尹喜候氣非此明矣而
往邈所由茲焉或可渭水又東逕武功縣西北俗以
散關名城非也褚先生乃曰武功扶風西界小邑也
蜀口棧道近山無他豪易高者是也渭水又與捍水
合水出周道谷北逕武都故道縣之故城西王莽更
名曰善治也故道縣有怒特祠列異傳曰武都故道

縣有怒特祠云神本南山大梓也昔秦文公二十七年伐之樹瘡隨合秦文公乃遣四十人持斧砍之猶不斷疲士一人傷足不能去卧樹下聞鬼相與言曰勞攻戰乎其一曰足為勞矣又曰秦公必持不休答曰其如我何又曰赤灰跋於子何如乃默無言卧者以告令士皆赤衣隨所斫以灰跋樹斷化為牛入水故秦為立祠其水又東北歷大散關而入渭水也渭水又東南右合南山五谿水夾澗流注之也

又東過陳倉縣西

縣有陳倉山山上有陳寶鷄鳴祠昔秦文公感伯陽之
言遊獵于陳倉遇之于北坂得若石焉其色如肝歸
而寶祠之故曰陳寶其來也自東南暉暉聲若雷野
鷄皆鳴故曰雞鳴神也地理志曰有上公明星黃帝
孫舜妻盲冢祠有羽陽宮秦武王起應劭曰縣氏陳
山姚睦一清按上云南安姚睦此云姚睦未知即一人也抑誤字也曰黃帝都陳
言在此榮氏開山圖注曰伏羲生成紀徙治陳倉也

非陳國所建也魏明帝遣將軍太原郝昭築陳倉城
成諸葛亮圍之亮使昭鄉人靳祥說之不下亮以數萬
攻昭千餘人以雲梯衝車地道逼射昭昭以火射連
石拒之亮不利而還今汧水對亮城是與昭相禦處
也陳倉水出于陳倉山下東南流注于渭水渭水又
東與綏陽谿水合其水上承斜水水自斜谷分注綏
陽谿北屆陳倉入渭故諸葛亮與兄瑾書曰有綏陽
小谷雖山崖絕重谿水縱橫難用行軍者邇候往來

要道通人今使前軍斫治此道以向陳倉足以板連賊勢使不得分兵東行者也渭水又東逕郁夷縣故城南地理志曰有汧水祠王莽更之曰郁平也東觀漢記曰隗囂圍來歙於略陽世祖詔曰桃花水出船槃皆至郁夷陳倉分部而進者也汧水入焉水出汧縣之蒲谷鄉弦中谷決為弦蒲藪爾雅曰水決之澤為汧汧之為名實兼斯舉水有二源一水出縣西山世謂之小隴山巖嶂高深不通軌轍故張衡四愁詩

曰我所思兮在漢陽欲往從之隴坂長其水東北流
歷澗注以成淵潭漲不測出五色魚俗以為靈而莫
敢採捕因謂是水為龍魚水自下亦通謂之龍魚川
川水東逕汧縣故城北史記秦文公東獵汧田因遂
都其地是也又東歷澤亂為一水右曰龍泉泉逕五
尺源流奮通淪漪四泄東北流注于汧汧水又東會
一水發南山西側俗以此山為吳山三峰霞舉疊秀
雲天崩巒傾返山頂相捍望之恒有落勢地理志曰

吳山在縣西古文以為汧山也國語所謂虞矣山下石穴廣四尺高七尺水溢石空懸波側注瀟漉震盪發源成川北流注于汧自水會上下咸謂之龍魚川

汧水又東南逕隄麋縣故城南王莽之扶亭也昔郭

欽耻王莽之微而遯跡於斯一清按漢書鮑宣傳是郭欽然郭欽有二一在

王莽傳見于鮑宣傳者不受莽徵閉戶而終見于王莽傳者仕莽為戊巳校尉拜填外將軍封剗胡子後

列于九虎兵敗守倉降于更始封侯姓名同而行事絕不相侔今道元以不受莽徵者為郭欽則是與世

本漢書異抑或六朝古本原是建武四年光武封朕欽字而訛而為欽未可知也

況為侯國矣汧水東南歷慈山東南逕郁夷縣

一清按下

有脫文逕平陽故城南史記秦寧公二年徙平陽徐廣

曰故郿之平陽亭也城北有漢郿州刺史趙融碑靈

帝建安元年立

一清按靈帝紀元為建寧獻帝紀元為建安未知靈字誤也抑安字訛也

汧水又東流注于渭渭水之右礪谿水注之水出南

山茲谷乘高激流注于谿中谿中有泉謂之茲泉泉

水潭積自成淵渚即呂氏春秋所謂太公釣茲泉也今

人謂之凡谷石壁深高幽隍邃密林障秀阻人跡罕

交東南隅有一石室蓋太公所居也水次平石釣處
即太公垂釣之所也其投竿蹠餌兩膝遺跡猶存是
有磻谿之稱也其水清冷神異北流十二里注于渭

北去維堆城七十里渭水又東逕積石原即北原也

青龍二年諸葛亮出斜谷與司馬懿

一清按下有屯謂有脫文

南雍州刺史郭淮策亮必爭北原而屯遂先據之亮
至果不得上渭水又東逕五大原北魏氏春秋曰諸

葛亮據渭水南原司馬懿謂諸將曰亮若出武功依

山東轉者是其勇也若西上五大原諸君無事矣亮
果屯此原與懿相禦渭水又東逕郿縣故城南地理
志曰右輔都尉治魏氏春秋諸葛亮寇郿司馬懿據
郿拒亮即此縣也

水經注釋卷十七